

IMA NDIŢO ETE

1 John 1:1-10; 2:1-17, 24, 25, 28, 29; 3:1-24; 4:7-21; 5:1-21; 2 John 1-6, 12, 13; 3 John 1-8, 12-14.

ỌYỌHỌ UKPEP-ŃKPỌ 361

Eke Ikpọ Owo

IKỌ IBUOT: “Edieke owo ọdọhọde ete, Mmama Abasi, ndien enye asua eyen-ete esie, enye edi osu-nsu; koro owo emi mimañã eyen-ete esie emi enye okokutde ke enyin ikemeke ndima Abasi emi enye mikekwe” (1 John 4:20).

I. Ebuana Ye Abasi

1. Jesus Christ, ima Abasi emi eyararede enọ nnyin, edi ńkukure idaha idaresit nsinsi, 1 John 1:1-4; 2:25; 5:11-13; John 3:14, 15, 36; Utom Mme Apostle 4:10-12; John 17:2, 3
2. Abasi edi uñwana, ndien mmọ emi ebuanade ńkpọ ye Enye enyene ndisaña ke uñwana enyuñ enim mme mbet Esie, 1 John 1:5-7; 2:3-6, 24, 28; 5:1-3
3. Nditọ Abasi enyene uyuhọ idara ke ebuana kiet ye eken ke ini mmọ esañade ke uñwana, 1 John 1:7; 2 John 1-6, 12, 13; 3 John 1-4, 12-14
4. Kpukpru owo ema enam idiọk, edi mmọ emi eyararede mme idiọk-ńkpọ mmọ enọ Abasi enyene erifen, 1 John 1:8-10; 2:1, 2; Mme ńke 28:13; Isaiah 55:7; Utom Mme Apostle 3:19
5. Mmọ eke emade ererimbot inyeneke ebuana ye Abasi, 1 John 2:15-17; ńwed Mbon Rome 12:2; Titus 2:12; James 4:4

II. Mme Andinim Ke Akpanikọ Edi Nditọ

1. Ima Abasi ayarare ke edikpe ekọm-urua man nditọ owo ekpekabare edi nditọ Abasi, 1 John 3:1-3; John 3:16; ńwed Mbon Rome 5:8; ńwed Mbon Ephesus 2:4, 5
2. Nditọ Abasi emi ema ekemana obufa inamke idiọk-ńkpọ, 1 John 3:4-10; 2:12-14, 29; 5:4, 5, 18-21; ńwed Mbon Galatia 6:7, 8; James 1:27
3. Nditọ Abasi emama nditọ ete mmọ, 1 John 3:11-19; 4:7-12, 20, 21; 2:7-11; 5:16, 17; Luke 10:25-37; John 13:35; 15:12; 1 Peter 1:22; 3 John 5-8
4. Uko ye mbuqtidem eto ke edinim mbet Abasi, 1 John 3:20-23; 4:17-19; 5:14, 15; John 15:7
5. Abasi edi oyọhọ ntiense ọnọ nditọ Esie, 1 John 3:24; 4:13-16; 5:6-10; ńwed Mbon Rome 8:16; ńwed Mbon Galatia 4:6

SE EKPEPDE EBAÑA

Ima Abasi

John, owo mbet Jesus, emi ekeberede ke ikpanesit Jesus, ewak nditiñ mbaña enye nte Mbet ima, idighe koro enye ekekperede Ọbọñ eti-eti ke ini ukwọrọ-ikọ Esie ke isua ita, edi ke abañã mme ntọtuñọ ukpep-ńkpọ ke mme ńwed esie emi abañade ima Abasi. Koro John ekedide oyọhọ ntiense ọnọ Jesus Christ ọtọñode ke ini ńtọñọ ukwọrọ-ikọ Abasi Esie tutu osim mkpa Esie ke kros, ama okonyuñ okut ufọn ima Abasi ke idem esie ye ke idem mme Mbet eken, ukpep-ńkpọ ima Abasi okotuk esit esie osim ukpọñ. Ke ediwak isua ema ekebe, ke idak nda-usuñ Edisana Spirit, enye ama ewet ekese abañã akpan ukpep-ńkpọ emi.

Mbet emi ama ewet ete: “Abasi edi ima”, ndien ima oro ama otim ayarare oto ke edinọ Eyen Esie kierakiet man afak ererimbot. “Enye ekedi ke ebiet Esiemọ, edi mmọ emi edide iman Esiemọ idarake Enye. Edi kpukpru owo eke edarade Enye, Enye ọnọ mmọ unen ndikabare ndi nditọ Abasi, kpa mmọ emi ebuqtde idem ke enyiñ Esie” (John 1:11, 12).

John ekedi kiet ke otu mmọ oro ekenimde enyuñ enyimeede Jesus, Eyen Abasi. Ke Jesus ama ọkonyọñ aka ke Heaven, John ama ọfiọk utọ eti ini oro enye ekenyenede, ndikodu ye Jesus. John ama ekeme ndibọrọ ini kiet ke abañã ekikere mme osioño-ndo emi ekedọhọde ete ke Jesus ekedi eti owo ye andikpep; onyuñ ọdọhọ ete: “Se ikodude toto ke eritọñọ, se nnyin ikokopde, se ikokutde ke enyin, se inyuñ isede, inyuñ idade ubọk ituk, ibañã Ikọ uwem” (1 John 1:1). Koro midighe obuk ye iyip akayarare utibe nsinsi akpanikọ emi ọnọ edima Mbet emi, edi Abasi Ete akayarade akpanikọ emi oto ke Heaven. (Se ke Matthew 15:16, 17).

Ifiọk Edimana Obufa

John ama enyene ifiok abaña Jesus ndien utọ ifiok oro odu ọnọ kpukpru owo. Jesus ọkọdọhọ Thomas ete: “Sia ama okokut Mi, omonim ke akpanikọ? Ọfọfọn ọnọ mmọ emi mikekwe, edi enimde ke akpanikọ” (John 20:29). Ke mme n̄wed emi John, owo mbet ewetde, eneñere etiñ akpanikọ ete ke Jesus ama ekpep ke ini utom ukwọrọ-ikọ Esie; oro edi, ndifiok Jesus ndinyuñ n̄nim Enye ke akpanikọ ọwọrọ ata akpan n̄kpọ akan ndinyene ifiok ibuot. Emi edi ata akpanikọ, koro ata akamba ubak mme anditiene-Christ emi enyene ifiok ibuot ke abaña Jesus enyuñ ekot oro “eti usuñ nditiene Christ.”

Ekeme ndidiọñ Jesus oto ke n̄kukure usuñ ifiok owo ndiyarare mme idiok-n̄kpọ mmọ nnyuñ n̄kpọn mmọ, ndien asaña ke uñwana Ikọ Abasi. Se N̄wed Abasi etiñde abaña ndinim Christ ke akpanikọ edi ofuri-ofuri edinim mme mbet Esie. Ke ini owo asañade ekpere Abasi, ayarare onyuñ ọkpọñde mme idiok-n̄kpọ, onimde Jesus Christ ke akpanikọ ye ufak oro Enye akafakde owo oto ke mkpa Esie ke krọs, Abasi ọfọn ido onyuñ enen ndifen mme idiok-n̄kpọ owo. Utọ ifiok Abasi oro edi se ekotde ete edimana-obufa. Edi ata akpan ifiok, ke esiode oro efep, baba owo kiet idikwe Obio Ubọn Abasi. (Se ke John 3:1-8).

Nditọ Abasi

Ifiok edimana-obufa ọkpuhọre owo ererimbot anam enye edi eyen Abasi. (Enye ọkpọdiok nte ọdọdiok mme ebik mbubik nte ededi, isehe nte enye okokoñde ke n̄kpọ uwem ererimbot emi, me enye akanam idiok ọtuñọ adaña didie). Esio ima n̄kpọ ererimbot ke enye efep, ndien ima Abasi ada itie esie. Ubiom-ikpe idiok-n̄kpọ ọwọrọ ọkpọn esit esie, ndien iwuk ke Abasi amana do onyuñ ọkọri, ọkọri adaña ini nte eyen Abasi emi asañade ke uñwana ikọ Abasi. Spirit Abasi edi ntiense onọ Spirit nditọ Esie ete ke mmọ edi nditọ Esie.

Kpukpru mme utibe edidiọñ emi, ye ediwak efep, esana ayak enọ nditọ Abasi oto ke akakan n̄wọrọ-nda ima Abasi. Utom efep emi okponde emi enamde ke esit owo oto nda-usuñ iyip ufak emi adade owo esin ke ubon nditọ Abasi edi idorenyin ete ke nditọ Abasi ke usen kiet ke mmọ eyekut Abasi nte Enye etiede. “Kpukpru owo eke edoride enyin ke Enye ntem enam idem asana, kpa nte Enye asanade” (1 John 3:3). Abasi anyaña ukpọn owo osio ke idiok-n̄kpọ, ndien edieke enye osuk akade iso ke idak mfọn oro, enyene idaha n̄kọri ke mfọn Abasi ọtọñde ke ini oro tutu eda ukpọn enyọn ke Heaven.

Mme idiok-n̄kpọ iduhe ke idem nditọ Abasi. Idiok-n̄kpọ edi edibiat mbet Abasi, ndien ekesio Jesus Christ enim man emen idiok-n̄kpọ efep. Ke Christ, idiok-n̄kpọ iduhe, ndien “Baba owo kiet eke oduñde ke Enye inamke idiok-n̄kpọ. Kpukpru owo eke enamde idiok-n̄kpọ ikekwe Enye, inyuñ ifiokke Enye” (1 John 3:6). Mbet emi, edi ọyọhọ ntiense ke mme utibe utom odudu Jesus, onyuñ emek ndikpañ utọñ ke nneme ye mme item Esie, otim etiñ añaña abaña edu ndusuk owo emi ekotde idem mme anditiene-Christ emi enamde idiok-n̄kpọ. Ke nda-usuñ Spirit, Mbet ọkọdọhọ ete owo ikemeke ndinam idiok ndien osuk edi anditiene-Christ. “Baba owo kiet eke Abasi okobonde inamke idiok-n̄kpọ, koro se Abasi adade obon enye nte eyen oduñde enye ke idem; enye inyuñ ikemeke ndinam idiok-n̄kpọ, sia edide Abasi okobon enye” (1 John 3:9). Abasi ọkpuhọ uduot owo, onyuñ emen udọn idiok-n̄kpọ ke esit efep ke ini owo amanade ke Abasi.

Ima Ke Otu Nditọ-Ete

“Ima odu ke oruk usuñ emi, itoho ke emi nnyin ikamade Abasi, edi oto ke emi Abasi akamade nnyin, onyuñ osiode Eyen Esie ọdọñ, ete, edidi usio-isop mme idiok-n̄kpọ nnyin. Ndim, edieke Abasi akamade nnyin ntem, nnyin nde ikpama kiet eken” (1 John 4:10, 11). Mbet Abasi ọdọhọ nditọ Abasi ema kiet eken, inọhọ nnyin ifet ndimek mme iyenam ntre me idinamke. Ke ofuri Obufa Ediom, ima Abasi ke idem owo ayarare ke ini enye ekemede ndima owo efep, ke ebede oro, enye inyeneke ima Abasi. “Edieke nnyin imade kiet eken, Abasi ododuñ ke esit nnyin, ema enyuñ enam ima Esie ọfọn ama ke uwem nnyin” (1 John 4:12).

Ima eke owo amade owo, ibemke ima Abasi ke esit anditiene-Christ iso, edi mmọ mbiba esaña ọtọ kiet. Nsọnesit ye ima Abasi ikemeke ndiduñ ọtọ kiet. Ndusuk owo eyeyuhọ ke ndima mme ufan ye mme owo obio mmọ, edi mmọ esua mme asua mmọ. Jesus ọkọdọhọ ete, “Ami ndọhọ mbufo nte, Ema mme asua mbufo, enyuñ ebọn akam eyom ufọn mmọ eke enamde mbufo isin-enyin: man mbufo edi nditọ Ete mbufo emi odude ke Heaven” (Matthew 5:44, 45).

Ima nditọ ete itoho owo, edi Abasi akanam enye esin ke esit owo. Ebuana ke Abasi ye ebuana ke otu nditọ Abasi esaña ubọk kiet, owo ikemeke ndinyene kiet, n̄kpọn enye eken. Ebuana ata nditọ Abasi ikemeke ndinyene mbiet; koro, ke akpanikọ, ebuana edi udomo idaha ke Spirit Abasi emi ọfiorode ke

ufot Spirit nditọ Abasi. Ke ini ebuana ke ufot owo ye Abasi abiarade, ebuana ke ufot esie ye nditọ Abasi eken onyũn abiara nko.

Ima nditọ ete emi edituño adaña didie? Enye enyene ndituño tutu anam eyen Abasi abuanu udia me nkpo ekededi eke enye enyenede ye kiet eken emi ananade. Edieke owo odohode ete imo idi owo Abasi, edi inyenke mbom ino eyen ete esie emi odude ke unana, ikọ esie idighe akpaniko. Spirit Abasi anam ifiok ete, nte Christ akayakde uwem Esie onno nnyin, ntre nnyin, “ikponyũn iyak uwem nnyin ino kabaña nditọ-ete” (1 John 3:16). Ke ini eyo mme Mbet, mkpaña ke abaña utom Abasi ama awak, ke akpaniko ekedi se owo kiet ke otu nditọ Abasi enyimeke ndiyak uwem esie, man nditọ Abasi eken ebho. Ima nditọ-ete ikpenyenke ndisuhore ke emi. Enye emi midinohọ owo obioñ udia esie, idikemekekeme ndiyak uwem esie nno nditọ-ete.

Ofiok-ibet okobup Jesus, “Andikpep, ndinam nso man nnyene nsinsi uwem?” Jesus okobup ofiok-ibet se ibet etinde abaña mbume emi, ndien ofiok-ibet ama oboro. Jesus ama odohode enye ete, “Omotim oboro: nam ntre, ndien eyedu uwem” (Luke 10:25, 28). Nso ikedi iboro ofiok-ibet? “Ma Jehovah Abasi fo ke ofuri esit fo, ye ke ofuri ukpon fo, ye ke ofuri odudu fo, ye ke ofuri ekikere fo; nyũn ma mbohidun fo nte idem fo” (Luke 10:27). Ima emi, ndien, edida osim nsinsi uwem onno owo emi enyenede enye. Nte ata ediwak owo mfin, ofiok-ibet okoyom nditebe idem esie ikpe, ntem ke enye okobup Jesus etin onno imo owo eke edide mbohidun imo. Jesus eketin mbuk Eti Owo Samaria, okonyun obup ofiok-ibet owo emi enye ekerede ete ekedi mbohidun Jew emi okoduode ke otu mbon-nwo. Ndusuk ini ofiok-ibet emi akasua owo Samaria emi, nte ediwak mme Jew enamde, koro enye mikadaha enyĩn, edi okonyime se idide akpaniko; “Edi owo emi akatuade enye mbom.” Ekem Jesus odohode ete, “Ka kanam kpasuk ntre” (Luke 10:37).

Fiak ti, ete, mbuk Eti Owo Samaria enyene nsinsi ebuana. “Anie edi mbohidun mi?” Mbume emi abaña kpukpru mmọ emi edidukde Heaven. Mbohidun nnyin edi adaña owo ekededi eke nnyin inamde eti nkpo ino, me enye emi nnyin idade isok Abasi.

MME MBUME

1. Emem adaña didie owo ndinyene ebuana ye nditọ Abasi?
2. Anie ke otu nditọ owo akanam idiok-nkpo?
3. Ke nso utọ usuñ ke ekeme ndifen ke mme idiok-nkpo nnyin?
4. Nso itibe ke ini owo odomode ndima Abasi ye ererimbot ini kiet oro?
5. Mme anie edi nditọ Abasi?
6. Nso edi ntak emi idiok-nkpo mikemeke ndidu ke uwem owo Abasi?
7. Nso idi ntak emi ofonde nditọ Abasi ndima nditọ ete mmọ?
8. Adaña didie ke eyen Abasi edinyime ndida ikọ ima emi nsok eyen ete esie?
9. Nditọ Abasi ekpenam didie ye mmọ emi ekworode nsu-nsu ukworọ-ikọ?